



BULAN BAHASA 2013

TEMA BAGI BULAN BAHASA 2013

'Ilmu, Budaya, Mesra'

Bulan Bahasa 2013 mengajak kita menggunakan Bahasa Melayu untuk tujuan meraih dan menyampaikan ilmu, memasyarakatkan kemurnian adab dan budaya serta mengukuhkan jalinan kemesraan sesama kita.

Bahasa Ilmu

Bahasa kita hidup apabila kita gunakan untuk pelbagai keperluan mencari ilmu. Sama ada digunakan oleh para sarjana untuk membina bahasa Melayu, untuk menimba dan mendalami pengetahuan agama ataupun untuk mencari makna kata dalam kehidupan harian, bahasa Melayu akan terus digunakan untuk mencari dan menambahkan ilmu masyarakat kita.

Bahasa Budaya

Adab murni dan budaya seni lebih bermakna apabila disampaikan dalam lenggok dan nuansa bahasa Melayu yang jitu untuk menyampaikan hati nurani orang Melayu. Dengan bahasa Melayulah kita mengenal elok budi dan budaya leluhur masyarakat kita.

Bahasa Mesra

Bahasa Melayu menjalin kemesraan dalam kalangan penuturnya. Tidak kira sama ada diselangi pantun dan puisi dalam majlis penuh takzim ataupun bersantai dengan keluarga dan sahabat handai di tepi pantai, bahasa Melayu menjadikan suasana bersama lebih akrab sekali.

'Ilmu, Budaya, Mesra'

Bahasa 'Ilmu, Budaya, Mesra' memperlihatkan pentingnya bahasa Melayu dalam segenap kehidupan masyarakat. Untuk itu, gunakanlah bahasa Melayu agar ilmu dan budaya kita tetap terpelihara dan kemesraan terjalin ketara. Terlestarinya bahasa dapatlah kita mewariskannya kepada generasi sesudah kita.